

四庫全書

集部

欽定四庫全書

椒邱文集卷十七

明 何喬新 撰

銘

陽休軒銘

御史中丞永新劉公宣撫楚甸嘗謁襄王王大書陽
休二字贈公俾扁其燕休之軒且為記以發其義揚
休見戴記玉藻篇說者謂陽與揚同休與噓同言和

氣接人如陽和之嘘物也賢王書此贈公蓋狀公之德云大夫君子咸為賦詠以頌公德而予為之銘其

詞曰

太和坤圜塞乎兩間吹之嘘之萬彙以蕃繁人之生寔稟茲氣充養有道式完以粹和氣內實德容外形溫乎其恭湛乎其清於為中丞氣剛且大先哲是師善養罔害如春之溫如醴之醇如彼時雨潤澤生民我思古人維顏若愚深潛純粹於道庶乎在宋有程金聲玉色涵

而克之渾然天德顏兮程兮百世之師是鑽是仰庶幾
同歸保我天和消彼陰慝晬焉盡兮斯為至德

恒齋銘

樂安唐君佐名其燕居之所曰恒齋蓋念其祖考世
有恒德故以是榜于其前朝夕出入觀焉思先世所
以為恒者而務及之也士大夫咸賦詩以發其名齋
之義而盱江何喬新為之銘其詞曰

天道維恒四序行焉人道維恒百行成焉相彼昧者乃

罔斯守虛而為盈無而為有樂只君子齋居晏如久焉
若暫終焉若初惟茲恒德匪今斯今乃祖乃考世有恒
心人之有恒若水有本放乎四海其流混混人之無恒
猶彼汙渠驟焉而溢倏焉而除嗟爾君子動息于此無
念祖考維恒是履南人之言大易之辭罔或忽忘念茲
在茲

德星堂銘

將樂陳君叔誠其先蓋出太丘長嘗構一堂以為燕

休之所其從父中書君為本太丘之事題之曰德星
蓋叔誠兄弟四人雍雍翼翼無愧紀謚而諸子若姪
又皆溫雅有學行克肖長丈兄弟者也試使太史氏
占之安知德星不爛然聚於斗牛之墟邪君之從子
監察御史維裕既求翰林學士王公記其事又屬喬
新銘之乃為之銘曰

粵城之隅有堂孔阜繫堂之人維時孔脩思印顯祖寔
長太丘懷德葆光卓焉寡儔仁義之澤延被後裔若紀

若謚難兄難弟念茲同德寔為荀君駕言訪之從子若
孫於維荀君亦多才子矯矯八龍乃饋乃侍靈臺哉哉
占象于天今夕何夕德星萃焉繇漢迄今殆于千禩荀
也罕聞陳則有繼其繼伊何有美叔誠溫乎其和介乎
其清克紹其先克啓其後玉樹瓊芝競異偕秀迪德在
人其象在天天人一理于茲徵焉高秋無月湛乎玉宇
爛然德星照我牖戶爰銘斯堂告爾來昆世德無怠以
永厥聞

持敬齋銘

龍虎山人張君留本四十五代天師澹然之從子也
嘗闢一室為藏脩之所扁曰持敬大理少卿李公既
為之記留本又屬予為之銘予嘉其有志於聖賢之
學也取吾儒之說銘之曰

靈臺孔微曰理之邪持之有要曰德之興其功伊何主
一無適無怠無荒有嚴有翼宵兮暗室若帝之臨坦兮
康衢若淵之深端爾之儀定爾之志儼乎若思肅乎若

祭心之流蕩譬彼逝川敬以為防湛乎澄淵心之放逸
譬彼奔驥敬以為勒馭乎按轡朝馬慄慄夕馬兢兢五官
弗擾百度惟貞從事於斯永矢弗渝匪仙之流伊聖之
徒嗟爾君子毋茲怠逸我銘爾心匪銘爾室

敬慎齋銘

無錫令李君叔蘭闢小齋於其署公退則燕休其中
而扁之曰敬慎間因冬官丁君元美屬予銘之予謂
敬以心言慎以事言能敬且慎修己安民之要不外

是矣乃為之銘曰

錫山之署有齋伊闢愷悌君子于焉燕息嗟爾君子惟敬是懷爾心或怠厥政以龐嗟爾君子尚慎無斁爾事或荒終累厥德敬之惟何夙夜兢兢譬彼涉川而履春冰慎之維何朝夕惕厲譬彼山行而蹈虎尾內敬于心外慎于事上帝臨汝其敢或肆從事於斯靡怠靡荒厥績用懋厥民用康華扁有煒齋居有翼銘以坐右尚勗

爾德

寶賢堂銘

晉世子既攝邦政爰作堂于王宮之西南以為燕休之所屏去玩好惟圖書琴瑟彛卣之器布列左右日延師碩論道講業其間扁曰寶賢蓋取周書召公之語也喬新宣撫晉陽祇謁世子于茲堂出示薦紳歌詠諸什且授簡俾賦焉迺再拜而獻銘曰

懸黎結綠梁宋所珍玩好之美匪益身心繁弱闕鞏魯晉是寶佩服之華靡茲治道若古有訓所寶惟賢於惟

王儲克迪斯言廼構茲堂以燕以息忠賢是親典謨是
式殷盤周誥味茲道腴左琴右瑟斥彼齊竽濟濟俊賢
廼賓廼友以糾我慝以詒我美若鄒與枚詞匪不工弗
以為寶厭彼雕蟲若衍與髡辨匪不博弗以為寶惡彼
曲學黃髮諤諤文儒申申所寶在茲又我受民漢有河
間克崇古學亦有東平惟善是樂弘我祖訓闡我大猷
與古哲王異世同休景霍之疆汾澮之域世祚大邦繫
賢之力

硯銘

硯之德直以方磨而不磷維其剛溫乎如玉涅而不緇
既貞且白宜君子之寶之其德若此其用則待乎時其
過於時也則勒彛卣之銘演綸綍之辭其不用也端居
深藏若無能為孔子云用之則行舍之則藏吾與汝其
庶幾

楷杖銘

予得孔林楷杖以遺予弟廷祺而為之銘曰

產于孔林化雨維深嗤彼桃竹出于江心匪規而圓匪
繩而直制以為杖用之無數金嶂銀溪出入相從或過
葛陂母化為龍顛兮汝扶危兮汝持爾子爾孫永世保
之

贊

附字辭

李晉王遺像贊

王諱克用其先本朱邪氏世為沙陀部長父國昌當
唐懿宗時從康承訓討龐勛有功始賜國姓附屬籍

累拜振武節度使王初為沙陀副兵馬使廣明之亂
遷鴈門節度使舉兵勤王誅黃巢復長安功第一遂
引兵東解陳阪之圍巢黨朱溫節度宣武媚王初功
夜遣兵圍之王幾不自脫既免歸晉陽以溫終為國
患數請討之當是時奸閹擅政宰輔非材顧右溫而
抑王已而朱邪王行瑜相繼構亂詔王討之逆臣就
戮勞賜優洽然昭宗不諒王心終疑而不用王既歸
鎮諸藩以賞罰無章愈肆兇逆溫遂逼遷昭宗洛陽

竟移唐祚溫之篡也蜀王建以書勸王稱帝王復書
曰誓於此生靡失臣節嗚呼王於國亡之後猶不敢
自帝况於宗國尚存忍隳臣節邪君相疑之過矣唐
有天下三百年宗室布天下如璘如煬遭時不靖竊
窺神器而振佐溫為逆以覆宗國亦何取於維城哉
王雖賜姓實非王胤然乃心帝室始終不渝賢於人
遠矣使唐倚為藩扞遽至於亡哉王志圖恢復抱憤
以歿而子莊宗克剪逆類復國號曰唐亦足以慰王

在天之靈矣王塋于代州今所謂晉陽是也予巡邊
至代得王遺像于寺僧亟命畫工摹而傳之感王忠
節遂為之贊其詞曰

蒲海之濱金山之麓產茲傑人面如赭玉齒豔倡亂爰
覆西都鑾輿狩蜀禁壘為墟王奮厥旅于彼晉陽龍旂
虎輶我威孔揚乃殲羣醜乃復帝京妖氛既豁九廟載
清維汝有梟實彼逆類險悍慄賊睥睨神器維君與相
聽胡不聽謂梟為鳳謂逆為忠兇渠是親忠謀是慙金

祥受冊宗祊以墜王心孔盡清淚浪浪移檄到閭誓復
宗邦天不憖遺溘然長逝錦囊三矢以遺厥嗣維嗣孔
武既孝且賢殄其鯢鯢祀唐配天嗟彼兇渠朽骨以腐
王歿不朽英聲並著堂堂遺像朱服玄冠百爾具瞻肅
然易顏

德馨堂贊

安成之書岡世傳為晉徵士陶元亮讀書處今國子
司業張先生振烈之居在焉先生之祖澧陵君素以

學行稱嘗仕有祿位矣既罷官南歸盡以先宅讓其族人而相故宅之旁得異地焉作屋數十楹而居之前臨東湖後負書岡烟雲紛蔚花竹繁鮮極幽雅之趣落成之日瀘溪司訓周君尚善以詩賀之有眼前多少幽人宅寧似其中有德馨之句鄉人傳誦焉澧陵君之子以儒起家累官祁陽教諭而其孫則司業君與其兄振光甫也司業君念嗣續孔繁堂構未稱乃與振光甫鳩工庀材聿新其居輪奐且奐焉而顏其

堂曰德馨取周君詩中語也間與予道之予惟德者
仁義禮智之得於心者也德蘊於心無聲無臭曷有
所謂馨香哉蓋盛德之至充諸身見諸行而洽諸人
則休聲令聞發而不可掩譬諸物之馨香旁達而無
間也世之穹堂奧屋侈且麗者不少然德義不聞君
子耻道焉澧陵君之宅傳子若孫而休澤益隆芳聲
益振非本於德耶夫藝蘭於阡蘭悴而香消樹桂於
庭桂摧而香絕惟積德於身則馨香旁達越百世而

有遺芳也若澧陵君是已命其堂曰德馨宜已哉喬
新與司業君同領鄉薦相好也乃為之贊以頌張氏
之世美且以最其子孫焉其詞曰

東湖之隩書罔之麓奕奕斯堂君子攸宅允哲君子遺
後以安肇此堂構孔阜且完禮以為門智以為牖厥德
惟馨曷云其陋顯允司業克承厥祉念我先宅胡茲傾
圯廼築廼揀乃茨乃塗高閣將將峻宇渠渠我居聿新
有嚴有翼曷克臻茲曰維先德我祖我考于茲享祀我

宗我嫻于茲燕喜斯堂何有馥郁其馨匪蘭匪蓀維德
昭升斯堂何有維香芬苾匪椒匪桂維德發越先祖之
基我維弘之先祖之德我維承之克永其德克篤其祐
如瓜斯縣永宅茲土嗟爾嗣孫陟降斯堂續之其艱維
德是懷我頌我歌以揚芳聲維雲若仍世振其馨

定遠張允器畫像贊

此子友定遠張先生允器之像也予與先生別四十
餘年矣思一見其眉宇不可得乃今於畫圖見之因

為之贊曰

涵和茹粹容色穆如帶規佩衡威儀肅如或玩游儵於
濠上或濯清風於舞雩不徇時以為通不泥古以為迂
觀其外則蕭然物表類山澤之臞探其中則淵然宏博
乃君子之儒噫斯人也采苓者之徒歟釣瀨者之徒歟

陳秋官贊

名章松江人

冰蘖之操梧竹之姿其檢身也以禮其酌酢也有儀所
味者道而澹然於人所同嗜所勇者義而退然於世所

競馳人所推者漢之不疑心所期者古之士師用能迓
休命保羣黎噫詩所謂邦家之基書所謂無疆之辭非
斯人將屬之誰邪

劉先生廷益字辭

福建按察使永新劉公之子裒既冠憲副四明錢君
字之曰廷益蓋附其名之義而為之耳公以裒之冠
予寔有位于賓祀俾申其義以飭之子惟裒之為義
聚也君子之求益必學以聚之焉山惟聚衆土也故

能益其高川惟聚衆流也故能益其深君子惟聚衆
善也故知益高明行益光大裒而聚之其求益之本
乎夫子生而父名之既冠而賓字之非直使之有美
稱而已蓋欲其顧名思義因字勉德而不失其所以
美焉裒也勗之四端五典之懿也禮樂名物之詳也
前言往行之浩以繁也博學以聚之反躬以踐之會
萬善于一身其為益也不亦深且遠哉祇通前休以
建嘉績以膺純嘏以為我皇家之世臣子有望於子

矣哀也最之尚無忘父若賓命名制字之意廼祝之

曰

維天之命播為萬理萃萬于一斯益於已六籍羣言既
浩以穰融而會之我智以明天道物理既微且密博而
求之斯協于一溫溫劉生文若杼霞哀名益字厥義孔
嘉學以哀之萬善咸備道積厥躬聖賢可企一簣不已
積為崇丘一勺不已渚為洪流於惟若翁為時膚使克
念厥紹乃為有子晉有碩輔其名曰哀仗鉞東夏厥聞

惟休虞有蓋臣實為伯益顯有不功皂旂是錫父命若
名賓制若字念之敬之古人是似我言惟服毋忽毋忘
受之天慶邦家之光

周仲儀字辭

古者子生而父名之既冠而賓字之禮也非求以為
美稱也周公孔子禮之所繇出者名其子曰伯禽字
其子曰伯魚易嘗求美稱哉後之君子愛其子者必
求美稱焉夫美稱者無它亦曰使之顧名思義曰仁

廸仁曰孝履孝焉耳名字所係豈輕也哉近世冠禮
既廢命字亦非其時士大夫簡於禮也甚矣惟御史
大夫太原周公則不然公之子紃年既可冠筮日擇
賓而授事焉既成禮賓字之曰仲儀蓋紃者冠之垂
王后親織以充耳者也古之聖賢知人之不可無威
儀也故為衡紃紃以章之為琚瑀珩璜以節之為
琴瑟鐘鼓以養之凡使之淑慎厥儀而已詩曰敬慎
威儀維民之則又曰慎爾威儀無不柔嘉蓋威儀之

不可不慎也如此紃雖冕之一物然一有缺焉則其制不備而不足為人之儀况君子之行一有虧焉其能使人則而象之邪名紃字仲儀父師之所望者遠且大矣豈徒使之有美稱哉春秋之法其人賢則字以褒之否則名以貶之二百四十二年之間以字見經者十有二人而已人有美稱而不失其美何鮮也仲儀其尚率禮無違進學不怠庶幾克保美稱詩所謂無不柔嘉維民之則者將於子乎見之僉謂仲儀

之冠喬新與供事焉俾為說以勗之乃敷其義而申之以辭其辭曰

冕之為制大備於周有紃有紕有覆有旒彼垂者紃維后所織以章令儀匪以為飾都憲之子內翰之弟曰紃其名仲儀其字服之有紃厥冠峩峩望之儼然可樂可嘉一或蹶焉厥冠僛僛就之弗畏無威無儀來爾仲儀明聽無惑淑慎爾止以成乃德去爾幼志毋儼以輕順爾成德克明以誠相爾嚴君國之司直正色立朝其儀

不忒相爾元兄出入鑾坡溫恭和懿其儀孔嘉爾往何
監監于父兄克敬克勤紹厥休聲克享遐福若軾有轍
若尹有陟嗟爾仲儀念之敬之成人之道祇服訓辭

椒邱文集卷十七

欽定四庫全書

椒邱文集卷十八

明 何喬新 撰

題跋

題金石例後

予少讀柳文肅公集見其序集賢學士潘公所著金石例者思一見其書而不可得訪之士大夫家無有也近與司封左君時翊論文及之時翊曰吾嘗得寫本于鄭

內翰瑤夫家因錄藏之予亟假以歸篝燈閱之其援據博其去取精修辭者得之真猶法家之有斷例也予受其書乃錄藏于家其書有鄱陽楊本傳貴全桐川湯植翁之序而文肅公之序缺焉故錄諸卷首然柳序稱公諡曰文簡而楊傳諸君子稱之曰文僖豈先諡文簡後改文僖邪抑傳錄之譌邪姑缺之以俟知者

跋閩人余應詩

皇宋第十六飛龍元朝降封瀛國公元君詔公尚公

主時蒙賜宴明光宮酒酣舒指爬金柱化為龍爪驚
天容元君含笑語羣臣鳳雛寧與凡禽同侍臣獻謀
將見除公主夜泣沾酥胃瀛公晨馳見帝師大雄門
下叅禪宗幸脫虎口走方外易名合尊沙漠中是時
明宗在沙漠締交合尊情頗濃合尊之妻夜生子明
宗隔帳聞笙鏞乞歸行營養為嗣皇考崩時年甫童
文宗降詔移南海五年乃歸居九重壬癸枯乾丙丁
發西江月下生涯終至今兒孫主沙漠吁嗟趙氏何其

雄惟昔皇祖受周禪仁厚綽有三王風雖因浪子失
中國世為君長傳無窮

此詩叙元順帝為瀛國公之子乃閩儒余應所作也其
詩有壬癸枯乾丙丁發之句蓋壬癸為水丙丁為火元
以水德王而宋以火德王也又云西江月下生涯終故
老相傳順帝北遁殂于應昌倉猝取西江寺梁以供梓
宮之用梁間隱隱有字亟視之乃西江月一調有龍蛇
跨馬亂如麻可汗却在西江寺下之句或云太保劉秉

忠所作故應云爾也考之於史瀛國公以德佑丙子降
元時年六歲後十有二年為至元戊子瀛國公學佛法
于吐蕃又二十八年為延祐丙辰仁宗遣明宗出鎮雲
南明宗不受命逃之漠北其與瀛國公締交蓋在此時
也托歡特穆爾以元統癸酉即位是為順帝時年十四
其生當在元祐庚申上距丙子凡四十四年而瀛國公
年始五十矣應之詩或有徵也史又云文宗以乳母失
言明宗在日素謂上非其子黜之江南召奎章閣學士

虞集書詔播中外而不言順帝為何人之子蓋諱之也
予年二十時赴江西鄉試於館人家見古樂府一帙內
有沙漠主一篇云楊廉夫所作予方從事科舉之業不
暇錄但記其篇末句云吁嗟乎鳳為鳩龍為魚三百年
來龍鳳裔竟來漠北稱單于又識其後云宋太祖之德
至矣肇造帝業不傳諸子而傳諸弟太宗負約金人之
旣舉族北遷而太祖之末孫復紹大統有江南者百餘
年為元所滅而瀛國公之子陰纂元緒世為漠北主天

之報太祖一何厚哉其言頗與應合近考鐵崖樂府無此篇豈出於假托邪抑有所遺邪新安程克勤錄此詩示予因具疏予所聞見者以廣異聞云

跋晦庵遺墨

吾盱眙氏兄弟俱遊紫陽朱夫子之門故得朱夫子手書為多其藏於光風霽月閣者凡二十五紙宋末兵火之餘逸其大半楚國程文憲公嘗跋焉元季焚掠之酷又復散失其存者僅此數紙與文憲公之跋耳而包氏

子孫不能守故此卷遂歸于郡之大家可慨也已予友左君時翊學朱而希包者也購得此卷寶之愛之殆若河圖大訓然或者顧謂善學朱子者亦惟志於其道焉耳區區遺墨朱子之糟粕也胡為睠睠於是哉是不然朱子之手書其詞則心聲也其字則心畫也讀而玩之使人形神肅鄙吝消固可因是以得其心於數百年之下矣是豈世之尋常詞翰徒以供耳目之娛者比哉明窻淨几展而玩之要當悚然易視如與朱子唯諾於武夷

九曲之間斯可謂善學者矣晦庵先生以豪傑之才聖
賢之學凡發於文詞者皆至道所寓非後世詞人所及
至其緒餘見于字畫亦皆遒勁雄放如懸崖之古栢出
峽之驚濤而非以書名家者所能彷彿也故其殘章片
簡流傳人間得之者弃而藏之不啻懸藜垂棘之珍盱
眙陳主事大章嘗得先生三劄於金華傅氏二劄皆上
時宰者前一劄乞減稅請祠後一劄乞痛治豪猾劄後
有大司成陳公大理少卿廖公題跋主事寶藏惟謹請

予識其未予閱之肅然起敬蓋三百年物矣嘗聞之書者心畫也因先生之書以求先生之心斯善學先生者已卽二劄觀之惓惓減稅可以見先生恤民之仁懇懇請祠可以見先生勇退之義請治豪猾又可見先生除惡佑善之心也主事於此求之則修己治人之道可以得其槩矣若徒玩物適情而已亦何益於身心哉所上時宰何人則陳廖二公考訂審矣予可畧也

跋古器物銘

三代盛時凡諸侯卿大夫有駿烈丕績者必作彝器而銘之所以垂不朽而昭示其子孫也其辭宏深奧雅與書之典誥詩之雅頌相表裏自浮屠氏入中國凡三代彝器往往毀之以鑄佛像其存于世者鮮矣予家食時村氓耕地得一器狀若古之所謂卣者村氓疑其金也剖而棄之予取以歸眎其銘識皆籀文知其為三代之物而惜其已毀也及來京師遊廢佛刹有僧以銅器焚彝狀若禮圖所謂敦者制作精巧其為古物無疑予欲

以白金市之僧靳而不予後數年過而問之則已為豪
有力者所攘矣乃知卣彝敦匱猶有存者特出非其時
遇非其人故湮淪毀棄而莫有寶之者矣則夫君子懷
瑾握瑜而不遇知者其沉沒無聞亦何異是器也予惟
嗜古每恨不及覩三代之禮器無以見聖人制作之盛
間取傳記所載古器物諸銘裒而錄之得三十有三將
以傳諸好古博雅君子蓋聖人之制作有道存焉是數
者雖其罷亡矣然頌其詞而繹其理非徒有以見盛王

良弼之德烈亦庶幾可以想見聖人之道焉豈眷眷於
器數之末乎哉

跋韓國華神道碑

右宋諫議大夫韓國華神道碑富弼彥國撰王珪禹玉
書國華魏國公忠獻公之父而富王二公嘗與忠獻公
同居政府其文與書皆可傳也富公以勲業名世其文
章不多見今觀此碑叙事質而不俚贍而不穢殆非稚
筆所及盖宋之諸君崇尚儒雅公卿百執事率用文學

之士故士大夫爭自淬礪於問學在當時雖不以文名
其文亦自有以過人如富公是已自元以來所用以為
公卿大臣者第取其體貌瓌梧音吐洪暢而以文學進
者不一二焉故雖耳目近事亦懵無所知不獨誤以
伏臘為伏獵杖杜為狀杜而已或譏其然則諛佞者又
從而解之曰夔龍稷卨所讀何書絳侯灌嬰重厚少文
者也執用人之柄者遂以為當然而不之怪嗚呼以卿
相之位而委諸不學無術之人宜夫治之不古若也悲乎

題先冢宰致政復留公牘

景泰中先公以老疾求致仕章五上廼得旨云朕欲留卿匡輔治道而卿累稱老疾辭歸田里特允所請翰林院寫勅書兵部應付脚力着去致仕陞辭之日上復眷留不許去先公上章固辭溫詔不允且斷來章吏部移咨請先君視事此當時公牘也少傅王文端公直侍郎俞公山項公文曜之花押存焉先兄本茂姪會同從孫豐寶藏已三世矣豐之弟疊懼其久而漫滅裝潢以

示子孫喬新稽首伏讀感先皇之寵光悼先猷之日遠
不自知涕泗之潛然也謹識于下方

題碧梧沈先生挽詩冊後

挽詩一冊大君子哀碧梧沈先生而作也先生吳興名
家其父以事謫戍撫寧先生長于戍所而讀書篤行喜
吟詠兼工繪事有薦于朝者召入供奉始徙家京師同
時被召者多得美官先生恬退不肯干勢要故不沾一
命以歿君子哀之先生將歿遺命諸子曰塋不歸故鄉

猶不葬也諸子以貧不能歸塋旅殯都城外者久之君子尤哀之此挽詩之所繇作也既而先生之子清刻苦力學思立其身以顯其親遂以明經登進士第出宰名縣入為郎官朝廷推恩贈先生刑部主事錫之勅命君子曰先生膺是寵命亦足少慰矣清奉使南畿始扶旅櫬歸塋君子又曰先生復魂故丘庶幾瞑目矣相率追賦虞殯之章以舒其哀清今為江西按察司僉事出此冊示予閱之盡卷作而言曰先生善人也清其孝子歟易

曰積善之家必有餘慶先生有焉傳曰立身行道以顯
父母清無愧矣嗟夫為人父為人子者讀是詩亦將慨
然興起乎遂題其後而歸之

跋二老餘芳卷

少師東里楊文貞公少游湖湘與太宗伯東吳楊先生
為布衣交既而公仕登朝致位丞弼而宗伯先生亦累
官翰苑交誼益篤詩筒尺牘之達還者殆無虛月先生
之門人湯原靜得公與先生遺墨若干幅裝潢成卷寶

而奔之間持至汲出示喬新俾識之喬新垂髫時以通家子拜公于私第逮今三十餘年盛德之容夢寐見之而公之瑩樹拱矣展卷莊誦凄然增歎又奚忍言邪然嘗聞君子之論公者謂公之清忠大節似宋廣平故考行易名皆以文貞而公之文視廣平過之其文章雍容純雅有歐陽公之風致如石臺沙羨諸作雜諸六一集中蓋未易辨而公辨章迓衡之功視歐陽公尤偉嗚呼自唐歷宋以迄于今兼二美者公一人而已宗伯先生

喬新未及識然與文貞公友而公之文亟稱道之公豈
阿其所好者哉則其賢可知矣是宜片簡隻字流傳人
間者為世所寶不啻天球弘璧然若原靜此卷是已昔
人有得歐陽公五代史稿者持歸其鄉以為寶二公遺
墨亦稀世之寶也湯氏子孫尚慎弄之哉

題劉原父投壺義後

臨川吳文正公校正儀禮既因鄭氏本而詮次其篇章
凡經文散見於戴禮鄭註者則表而出之為逸經八篇

禮必有義又取戴記所存與清江劉原父所補者為傳
十篇若士相見義公食大夫義則原父所補也予近讀
原父文集又得投壺一篇蓋釋禮經投壺之義也故附
錄于朝事之後以備逸經之傳焉正經十七篇有傳者
十逸經八篇有傳者一其餘缺焉崇禮君子雖追而補
之可也或曰東哲補南陔諸詩白居易補湯征皆見非
於君子原父所補亦南陔湯征之類耳豈可取以為訓哉
予以為不然南陔湯征經也經出於聖人所刪補之僭

也冠婚諸義傳也傳出於周末漢初諸儒所作補之奚不可邪且朱子嘗補格物致知之傳矣今與曾子之傳並列于學官未有非之者苟以補傳為不韙則朱子豈為之哉

書儀禮叙錄後

儀禮十七篇有禮有記禮則其正經先儒以為周公所作記則述其儀節之詳蓋周末諸儒所記以補正經之未備者也每篇正經居首而記附焉自高堂生所傳及

唐石經皆如此宋紫陽朱子作儀禮經傳通解始以記
文附于正經各章之末臨川吳文正公疑其經傳混淆
為朱子未定之稿乃重加考訂一仍高堂之舊而為之
詮次焉先王之制度粗可考矣元季兵燹其書散亡深
可痛惜喬新弱冠嘗讀儀禮註疏而愛之方研究其奧
旨尋以科舉之學中輟登第以來讀文正公三禮叙錄
又知公嘗考定是經銳意求之庶得以盡心焉徧訪藏
書之家無有也三禮考註近刻於吾盱廬陵楊文貞公

以為此文正公所考定而晏壁彥文掩為已作者也竊
嘗考之文正公考定儀禮正經與記一仍其舊今考註
仍於朱子通解經傳雜然無倫其所註釋徒取鄭玄賈
公彥之說而綴緝焉亦與易書戴記纂言之文不類決
非出於公手豈晏氏不見公本而以已意為之邪喬新
不揣庸陋輒因唐人石經兼考叙錄詳加校定經自為
經記自為記而不相雜揉其章次則依朱子所定亦不
敢妄為紛更冠昏二篇賓主問對冠字醴醢之辭石本

俱在經文之後今因朱子移置各章之末蓋欲便於讀者也於是儀禮十七篇復為完書嗟夫秦火之餘先王典禮十亡八九其存于世者惟此十七篇而已炎漢以來雖未能舉行然猶列之學官師弟子講習焉自王安石廢經用傳士大夫知此經者鮮矣喬新少嘗讀之而不能無韓昌黎之患每欲採摭諸儒之說為之註以成紫陽臨川二大儒之志今學殖荒落不能為已姑校正遺經藏之家塾傳之同志庶幾有好古之士為吾所欲

為者豈非曠世之一快哉

書資治通鑑後

司馬溫公資治通鑑二百九十四卷天台胡三省註并
釋文辨誤十二卷凡八十本板在南京國子監初公作
此書讀者病其太詳往往不能終卷子朱子取其事之
大者為通鑑綱目蓋用春秋之法也今綱目盛行于世
而此書幾乎廢矣加以卷帙重大人不易致非好古博
雅之士鮮克留心成化丙午秋鬻書者攜此書款門求

市予以它書易得之蓋正統初所印者顧多殘脫乃徧假諸名公家藏本叅互校補然後可讀雖其楮墨未精然視它本頗為完善謹識于此使予後之人知得書之艱而保之不敢失云

書國學羣書殘編後

元有天下垂百年頗崇儒雅經籍之板藏于國子監者甚富天兵入燕百司安堵經籍度置如故無毀棄者宣德以來典守者不以為意蟲鼠蛀齧之餘膳奴監隸或

竊以宿火殘脫磨滅百僅一二者存焉然其存者字畫
既妙刻手亦精非今書坊鹵莽之比雖殘章斷簡使人
把玩不忍釋手今大司成京口費公惜其可寶而不完
也廼模印裝褙共為一帙間以遺予予閱之如夏小正
考儀禮逸經江文通文集皆今世所不傳者又其字偏
傍多用古法精緻可愛因題其目曰國學羣書殘編時
出而覽之亦足以佐嗜古之癖昔人有得古漆簡者寶
而藏之此編豈徒漆簡之比哉廼書以示後之人

題皇明文纂後

文纂四十卷金華鄭栢編選我朝名公俊儒所作詩文也國家承平百有餘年文章軼宋元而追周漢者蓋多矣萃而選之以繼蕭統姚鉉呂伯恭蘇天爵之書者惟姑蘇劉欽謨文要與栢此篇欽謨所選諸體未備又徒詳於洪武間諸公所作自永樂以降遺缺甚多不足以備一代制作之盛栢此編諸體畧備然所去取摭星宿而遺義娥者蓋亦不少讀書不能無憾焉予嘗欲合二

家所選嚴擇而精采之勒成一書以昭皇明文章之盛
顧以俗務倥傯未暇為也此編予得之盱眙陳主事大
章卷中多錯亂乃為正其錯簡重加裝褫而識于卷末
云

謹題牧民備用後

我朝自太祖皇帝受命建號至宣德初蓋六十餘年矣
宣宗章皇帝篤意於阜成兆民妙簡朝臣素有政聲者
出為郡守蓋欲比隆周成康之世漢文景之治也惟時

先公以監察御史為大臣所薦出守永嘉上宴勞賜璽書俾馳驛赴任永嘉古之東甌地在海上頗號難理先公感上簡命之意思欲追古循良之迹凡為郡所以事神治民者條列為一書名曰牧民備用盖多本之經史而叅以時政也既數月郡境稱治聞於京師及先公入覲召入便殿命近臣傳旨獎勵并賜御製招隱歌由是政聲聞於天下以為龔黃卓魯不足多也相知有來問先公所以為政者先公命錄牧民備用以遺之有依倣

而行之者亦皆以善治聞好事者以傳錄之艱因為鏤板以廣其傳而歸其板於吾家藏於吾弟喬壽之書樓近為回祿所燬而得之者鮮矣邑庠生黃鶴以為是書簡而不迂質而不俚考之古而無戾施諸今而可行實為政者之準繩也每見有司為政防範不密重貽民害者輒曰彼未見吾先正牧民備用故耳乃捐貲重刻之凡為郡縣者輒摸一帙以贈之曰諸公依此而行則吾先正之仁政徧於郡縣矣刻既成又托予甥揭瑀捧以

示予屬題其後先公諱文淵世家廣昌宋寶謨學士坦
之裔也為郡六載徵為刑部侍郎其後累官太子太保
兼吏部尚書昔人有言施藥不如施方有司之得此書
其猶醫者之得方歟鶴之用心仁矣哉他日為政必能
心先公之心矣名位所至其可量乎

書老子道德經後

老子道德經五千餘言臨川吳文正公為之註分為四
卷定為六十八章予與大宗伯瓊臺丘公仲深論老子

公曰註老子者數十家惟文正之註為善蓋諸家之註或以為神仙修養之術或以為用兵權謀之說是皆知其一而不知其二者也惟文正公註深得老子之旨臨川舊有刻本而今亡矣今其書幸載于道藏經子試求之予因托公假諸道流久而未得今年春公與予陪祀南郊同宿于神樂觀公乃假于道士以示予予亟命書吏錄之以歸篝燈閱之其言簡而明近而易知老子所謂道德之旨燦然矣河上公林獻齋之說皆不及也予

觀老子之說世儒多非之然大要以清虛為本以慈儉為用是亦不悖於吾儒也使為君者用之必能如文帝恭儉愛民為相者用之必能如曹參清靜為治矣豈可輕訾哉因識于卷末

跋大事記續編

大事記續編凡七十七卷翰林待制金華王公子充所著公與宋學士景濂皆以文章學術顯于國初同典制誥後奉使南詔諭元宗室梁王巴圖不屈死之蓋公與

宋公皆黃文獻公晉卿之門人齊驅藝苑世無異論然
嘗考之宋公之文雄渾瞻麗自蘇長公後鮮能及之公
之文好模擬甚者剽前人之成說

如贈郭士中序用馬
子才子長遊蕭然堂

記用曾南豐
記學舍之類

非宋公自成一家言者比至其學術亦有

不同金李純甫著明道集說以孔孟老莊並稱宋公譏
其偏駁是矣公序其書乃以豪傑之士稱之又何所見
邪其著此書蓋以續東萊呂公所未就者也然東萊作
大事記在朱子通鑑綱目未作之先綱目盛行于時此

書不可作也其間予奪褒貶又與綱目大不合者綱目以昭烈紹漢統章武紀年直接建安此萬世不易之論也此書顧謂抑揚太過乃用無統之類例以漢與魏吳並從分註不從朱子而取陳壽裴松之之說可乎不可乎綱目出武后之號紀中宗之年每歲書帝之所在蓋春秋書公在乾侯之例也此書乃以武后紀年則所謂秉筆迷至公者豈獨歐陽子哉李克用父子在唐雖未為純臣然唐亡猶稱天祐年號以討賊為辭名義甚正

故綱目紀年先晉而後梁是廼春秋存紀存陳之義也
此書乃先梁而後晉不幾於獎纂乎夫學如朱子著述
如綱目亦可以止矣而公此書乃故為異同豈好奇之
過邪公在建文間以近臣言其死節特贈翰林學士謚
文節永樂初凡建文所設施悉皆革去無敢復稱其贈
謚者正統六年義烏丞廬陵劉傑以公死節請加卹典
乃贈翰林學士謚忠文云

題元祐黨籍碑

元祐黨籍碑一卷蔡京元長所書也崇寧初京在相府追憾元祐諸賢乃籍司馬光以下三百九人指為奸黨請徽宗書而刻之又自書頒于天下俾各刻石以示後世京之意蓋欲污蔑諸賢使其子孫亦有餘辱也抑豈知公論之在人心者終不可泯至于摩挲遺刻歷數姓名粲然若繁星之麗天雖其子孫亦以祖父得與涑水伊川聯名為榮曾不以為辱也嗚呼愛憎之私果何以掩是非之公邪京可謂謬用其心矣碑之所列德業無

聞者居多然賴此碑之存而天下後世知其為君子之黨是則京之詆之乃所以譽之也歐陽子有言彼讒人之致力乃借譽而揄揚豈不信哉雪川沈暉以其祖干名在黨籍懼久而磨滅特取家藏榻本重刻于石行人司副姑蘓周君得此卷出以示予瞻仰之餘肅然起敬因識于下方嗚呼世之惡直醜正彷彿於京者覽此碑尚亦自省哉盱江何喬新識

恭題恩榮錄後

冬官郎中臣冕錄其筮仕以來所被制勅命誥璽書凡
十有二通而題其目曰恩榮錄將刻諸家塾以示其子
孫且屬臣喬新題其卷末臣伏讀而嘆曰大哉皇言是
足以昭一代之人文非惟為蕭氏一家之光寵而已盖
冕初以進士試于廷先皇帝賜之制策而問焉俾陳其
所蘊遂擢上第既而除冬官主事遷員外郎以至今官
恭勤周慎克舉其職先帝嘉之推恩其父母以及其妻
凡再賜勅誥以示旌褒尋以潁川營建王府工大役繁

特勅臣冕往董之所以申飭戒勵之意尤為深切今冕所錄是也臣惟古昔聖帝明王訓迪厥官具載于書不可尚已西漢詔令深醇簡盡猶有典誥之遺風焉河汾王通取以續典謨訓誥誓命之文蓋有以也六朝以降文日靡麗非王言之體矣我國家以人文化天下凡絲綸之出典雅深厚蓋軼西漢而追踪于三代後世有如通者安知不取之以續書邪冕之子孫於是錄寶之奔之口誦而身履之則所以光前啓後之道在是矣若徒

持之以誇閭里則豈臣冕所以示後之意哉

題助教林君致仕公牘

弘治戊申冬十有一月南京國子監助教莆陽林君文華以內艱服闋至京慨然嘆曰吾老矣齒髮衰而筋力憊可以休矣廼請于吏部願致其政以休于家太子太保吏部尚書王公侍郎劉公楊公嘉其恬退為請于朝聖天子俞其請俾以其官致仕吏部移文飭郡縣以禮相待且蠲其繇俾得自逸又劄付君曰其以禮自處毋

干有司之政君得請喜甚既詣闕頓首謝且以所得吏部劄裝演成軸持示予請識之子惟先王之世為士者四十而仕五十而爵七十而致仕而年至者請于上曰吾力不能任干戈而謀不足贊國論願乞身以休為上者亦曰大夫誠老矣吾不敢煩以政賜之几杖俾休于家當是時士皆明於進退之禮而無貪戀寵利之私漢以來禮廢而士俗薄於是乎有年餘八十猶托權近求進者矣有老而當罷叩頭祈哀而不耻者矣我國家以

禮待士而士亦以禮自待其身然其濡忍將老之年以
苟升斗之祿者蓋亦有焉君年方六十有六精力未衰
而毅然求去視彼冒昧而不知止者其賢不肖何如也
君歸矣日與鄉之耆德探壺山之幽勝濯涵江之清流
唱和於山霞水月之間以寫夷猶之悰以頌國家太平
之盛以追蘇太傅楊司業之高風人之望之何啻登仙
邪是劄也傳之後世將有低徊感嘆曰朝廷待士以禮
如此林君以禮自待又如此是豈尋常吏牘之比哉君

名英以鄉貢進士起家歷寧遠吉豐教諭瑞州教授以至今官所至以善教稱

書三國志後

陳壽三國志十有四冊予巡撫晉陽時錄于襄陵縣學蓋少宗伯邢公所印南雖本以遺其後學者也其間殘缺甚多予因令裝書者遇有脫簡置空紙焉聞士夫家有善本輒假而補之十僅得二三近聞吳興大姓有元末印本最為精善乃托主事沈清就其家錄而補之然

後稍完雖間有缺文誤字可以意屬讀也壽作此書帝
魏而寇蜀吾先儒嘗斥其非然其叙事簡健非李延壽
輩所能及而葉水心謂其勝班固則謬矣裴松之註時
有異聞可喜亦好古博雅者不可廢也金華吳師道論
壽叙事多摹倣左傳班史事多失實予謂後世作史者
通相摹倣非獨壽書然也校補既完因識于卷末

書金榮襄公碑陰

太子太保兼戶部尚書追封沐陽伯謚榮襄淮陽金公

先公之同年友也自初仕為監察御史晚歲同以宮保
兼六卿相得甚歡先公每稱公為一代偉人公之薨少
保兼太子太傅芳洲陳先生為撰神道碑其家久未刻
蓋有所忌也至今三十有八年矣予托淮陽太守徐侯
用和求諸其孫得錄本於故篋字多脫謬侯錄示喬新
且礱石置隧道屬喬新校定其文將刻之以圖永久喬
新乃取東魯許先生所述公行狀校其訛缺竊惟芳洲
與公仕同時碑文宜詳實然叙公平閩寇之功甚畧而

自戶部左轉工部又似有所諱者喬新公通家子也敢述耳目所及者以補碑文之缺初公受命南征兵抵浙江遣都督劉德新以偏師繇杉關進自與寧陽侯陳公帥大兵繇分水關進刻期會于延平及兵至建寧賊首鄧茂七已敗死餘黨立其姪為主勢益熾公揭榜招諭降者日數千惟兇徒負固不服公乃進兵沙縣剪貢川焚掛口夷陳山而尤溪將樂諸邑以次破降遂分遣偏裨解汀漳之圍不數月八閩肅清其策畫皆出于公諸

將受成算而已及在戶部南北用兵儲備不足公經度
攬拾未嘗乏絕浙東大姓有輸歲賦綿絹至京者適有
詔蠲逋賦乃匿其半而以其半賄權貴囑公以赦蠲之
公言此乃已徵在官者力持不可權貴怒噬臺諫劾公
文致其臯請下廷尉景皇帝察其誣不許都御史王文
素與公有隙抗言詆公以為不可宥景皇帝不得已乃
落公太子太保改工部尚書時先公為吏部尚書上言
北境未平南夷復闕所急者軍儲耳金帛有經濟才其

計度財賦以充邊儲非為私也自古理財之臣多招怨
謗如唐之韓滉宋之趙開是已惟陛下察之書上景皇
帝嘉納還公戶部尋復太子太保此二事皆喬新所睹
記者不敢誣也嗟夫讒說殄行古有之矣何必諱哉謹
識于碑陰使來者有考焉徐侯名鏞武昌人起家進士
為監察御史以謇諤聞其在淮陽清慎寬和有古循吏
風觀其墓公為人而為之刻碑志尚之卓可見矣

跋書傳輯錄纂註

右鄱陽董氏輯錄纂註二帙先冢宰舊讀之書也國初用翰林學士劉三吾等言蔡氏釋書有與朱子不合者乃作會選於蔡傳多所更定頒之學校用之科目先公生當喪亂之後經籍非書坊刊行者不易得當是時學者所習惟輯錄纂註而已乃假會選官本采其說之異於蔡傳者錄于輯錄纂註之上下闌已見于纂註者則但云取其氏說其圈點批抹皆先公之手筆先公既以是經登進士第而書藏于家無少損也及四書五經大

全既頌而會選又廢矣喬新少讀是經弄藏惟謹比者
盱水泛溢頗有損壞乃命從孫豐重加裝褫間有殘缺
者不復補存古之意也既完韜以綾帕而藏之嗚呼此
書先公手澤所存也凡我後人知祖宗得書之艱嗜學
之勤尚思所以寶之哉

書進士登科錄後

國朝故事進士釋褐之後禮部錄讀卷執事之臣氏名
與諸進士家狀并及第三人之對策刻之為登科錄既

進御乃敝在朝羣臣及諸進士以布于天下先公以永樂戊戌登進士第所受登科錄藏于弟喬壽之書樓久矣不幸燬于火予極力訪求不可得近乃得此卷於同邑陳氏家而首尾頗殘缺亟命從孫豐補綴裝褫藏于家嗚呼昔人於平泉樹石猶切切焉戒子孫以保之況此錄國家之令典先世家狀存焉子孫覽之可以知先世交遊之多賢家學相傳之有自也宣平泉樹石之比哉以平泉樹石與人者猶曰非吾子孫則以此錄與人

者真豚犬耳嗚呼凡吾子孫尚念之哉弘治壬子秋七月丁丑不肖孤喬新識

題江西鄉闈錄後

永樂甲午科江西鄉闈錄一冊蓋先公登科之年也程文凡廿四篇而先公所作說命義在焉是歲蕭山魏先生仲方考書而它經之去留多取決于先生故所取多知名士如少保泰和陳公循學士吉水周公叙侍講安福劉忠愍公球刑部侍郎丁公鉉監察御史吉水孫公

鼎憲副永豐彭公勗與先公皆以學行有聲場屋及小錄出土論翕然以為得人而程文純正亦非它料所及此冊先公得於江西鹿鳴宴所放者也藏于家八十年矣頗有殘脫乃命從孫豐用錄繅重裝而寶藏之弘治壬子夏六月庚申不肖孤喬新謹識

書元豐類稿後

南豐曾先生之文有元豐類稿五十卷續元豐類稿四十卷外集二十卷南渡後續稿外集散軼無傳開禧間

建昌郡守趙汝礪始得其書於先生之族孫濰缺誤頗多乃與郡丞陳東合續稿外集校定而刪其偽者因舊題定註為四十卷繕寫以傳元季又亡于兵火國初惟類稿藏于秘閣士大夫鮮得見之永樂初李文毅公為庶吉士讀書秘閣日記數篇休沐日輒錄之今書坊所刻南豐文粹十卷是也正統中昆夷趙司業琬始得類稿全書以畀宜興令鄒旦刻之然字多譌舛讀者病焉成化中南豐令楊參又取宜興本重刻于其縣踵譌承

謬無能是正太學生趙璽訪得舊本悉力校讐而未能
盡善予取文粹文鑑諸書叅校乃稍可讀文鑑載雜識
二首并書魏鄭公傳後類稿無之意必續稿所載也故
附錄于類稿之末嗚呼先生之生當洛學未興之前而
獨知致知誠意正心之說館閣諸序藹然道德之言其
學粹矣至其發之賦詠平實雅健昌黎之亞也世或謂
其不能詩者非妄邪校讐既完謹識于卷末

跋先兄本茂書蘇秦苦學事

予初學時先兄本茂手書蘇秦讀書欲睡引錐刺股之事以示之且曰秦之刻苦讀書志在說諸侯而取貴富耳世之學者以秦之勤而從事聖賢之學何患不造其極哉喬新揭諸書齋之壁朝夕顧諟不敢忘及宦游中外吾兒道同懼其久而脫落也命工裝潢成卷藏於家近者予謝事南歸閱家中舊書得此卷時先兄去世已三十餘年矣展誦再三恍若見先兄之面俯仰隔世泣然久之嗚呼先兄之教不肖弟者至矣弟以愚且懶而

於所謂聖賢之學終莫能窺其門牆徒抱終身之恨耳
乃拭淚識于下方以示子孫使有志于學者以秦之刻
苦自勵而以予之愚懶自懲

恭題宣廟戒諭文武羣臣勅

宣宗章皇帝嗣位紀元之初敕諭在廷文武羣臣各修
職業以贊丕平之治此先臣某為監察御史時所被勅
書也聖諭有曰爾文武羣臣其必有以副朕之望據誠
秉義茂乃嘉猷以輔予德又曰治民者悉心愛民治軍

者悉心愛軍用副朕子惠羣生之意又曰端乃心慎乃
行務忠厚而戒刻薄務正直而戒邪枉大哉皇言蓋以
帝舜命九官十二牧成王訓迪百官之旨異世而同道
也先臣受勅以來夙夜祇奉弗敢違其後出守溫州召
為刑部右侍郎改吏部左侍郎陞吏部尚書加太子太
保歷官三十餘年奉以周旋罔敢失墜宣廟龍馭陟遐
久矣先臣違世亦將三紀矣而是勅在臣家寶藏惟謹
臣弟喬年懼久而磨滅乃命工裝潢成軸貯以金龍匣

藏于高閣不敢褻也而屬臣識于下方臣竊聞先儒朱
熹讀魯鞏所擬制詔稱其軼漢唐而逼典謨世不以其
言為過臣伏讀聖諭雄渾灝噩真可媲美典謨而無愧
矣異時望氣者見龍光燭天煜然斗牛之分必聖諭所
在歟時弘治六年九月一日刑部尚書臣喬新拜手稽
首謹識

跋胡氏大雅堂卷

君君臣臣夫夫婦婦天下之正道也不幸而遇禍變焉

臣効其忠蹈白刃而不悔婦秉其節歷艱險而不渝可不謂大正矣乎然忠臣節婦同出于一郡一縣者蓋寡矣同出于一家者蓋絕無而僅有也若鄱陽胡氏萃忠節於一門殆曠世而一見者歟當元之季羣盜蠭起胡君振祖舉義兵克復城邑行省錄其功授饒州府判轉戰至浮梁矢盡糧竭以身死之君子稱其忠君之配趙氏聞變攜其孤叔儀避于鄰境踐荆棘冒雪霜紡績自給卒全其孤以不隕其祀君子稱其節及天下既定叔

儀奉母歸復舊業作堂以居之中書左丞周公伯琦為
題其扁曰大雅而學士宋公景濂為之記蓋雅之云者
正也為臣而盡其忠為婦而盡其節非所謂大雅乎叔
儀五世孫韶舉進士累官刑部員外郎乃取周公之篆
宋公之記與董蔡二先生之傳名公碩儒之歌詩萃為
一卷屬予識其後予三復而有感焉當宋之末疊山先
生以秉節不屈死而其夫人李氏亦自經于獄中君子
以為忠節萃于一家及元之末又有如府判夫婦焉饒信

相望三百餘里而忠臣節婦兩見於其間豈非吾江右山川正氣之所鍾歟予既感府判夫婦之忠節而左丞之篆潛溪之文又素所向慕者遂識而歸于韶嗚呼韶為忠臣之後尚思趾美踐猷以不忝大雅哉

跋晦庵真蹟

晦庵先生潛心聖賢之學探索至道其於詞章字畫蓋有不暇留意者今觀先生自書所和張宣公城南雜詠二十首其詞渾厚和平有盛唐風致其字如孤松老栢


晉宋間以書名家者未易及也是雖大賢多能所到其所以然者亦本於心耳先生之學以正心為本夫詩心聲也字心畫也心得所養則發之於詩形之於字卓乎絕俗豈世之憊精疲神以學詩學字者所可彷彿哉善學先生者詠其心聲玩其心畫則放心自復鄙吝自消固可得其心法於詞句點畫之表矣方伯沈公時暘得此卷寶之不啻懸黎照乘之琬間出示予拜觀之餘肅然起敬謹識其後而歸之

跋蘇穎濱帖

右穎濱先生答司法廬陵曾君安強書一通先生歸自
嶺表道廬陵而北司法君兄弟見之且致書求教此先
生之書所為答也書中稱溫夫之清高并及移忠之禾
譜溫夫諱肅嘗舉進士不第歸而讀書教子不復仕司
法君之父也移忠諱安止登進士第為彭澤令嘗著禾
譜東坡先生讀而喜之司法君之兄也父兄之賢如此
司法君之賢盖有自矣然而三復此書而有感焉先生

見忌於時宰臺諫乘風排擊遠竄瘴癘必死之鄉當是時門生故吏皆畏黨禍無敢通音問者而司法君廼能款接無所顧誠哉所謂賢者也世之為士者勤學好問為利祿計耳一登第則視故所業若敝屣然其習至今猶然也司法君登第且有官矣而知王氏新學之非猶欲求益於先生不賢而能如是乎即是二事可見其卓乎不可及也司法君之裔孫望宏為刑部主事寶藏此書不啻崇磬離鼎然間持以示予請識之予既感曾氏

先世之多賢又喜其後裔趾美承休不墜其家聲也因
識而歸之



椒邱文集卷十八